

沙南遺草六卷

休寧葉權中甫著

金鵠季黃選

汪大同公對閱

汪元英大呂校

七言律詩

閒居

誰去誰從自定居不勞詹尹卜何如風流陶令
貧貪酒老大虞卿窮著書白水分畦春鳥散綠

陰交戶午蜂踈傍人過聽吟梁父彷彿茅堂是
草廬

秋懷

邗溝水落蘆蕭森毗陵城東玉露深岳宮銀杏
霜萬片將臺碧梧秋十尋愁心正續三更漏別
恨偏關萬戶砧燈前獨飲意不盡况乃寒蛩階
下吟

落花

上苑春殘雨妬花餘香非復舊繁華黃鸝亂蹴
紛二落粉蝶相隨故二斜好入深閨度簾箔漫
從流水委泥沙開時曾倚東風力莫對東風苦
怨嗟

憶昔四首

歸來不覺鬢生華苦憶錢塘夢裏家夜月滿樓
三市酒春風千樹六橋花紅亭歌馬山迴合綠
柳啼鶯路狹斜我老尚堪東下棹故人凋謝各
天涯

其二

南樓情思近如何烟雨蘓亭幾度過一日鄉園
生計少十年親故絕交多春泉芳冽吳門茗夜
雨淒清越調歌欲向江湖尋往跡不堪征客怨
關河

其三

憶昔南湖二月天日携三友醉花前知心但覺
餘桃美適意翻憐一目全錦里韶光催暮景玉
樓春色妬芳年只今惟剩閒庭草惆悵王孫若
箇邊

其四

幾載蓬踪逐旅囂粵南燕北路遙二尊前黑髮
交遊盛橐裏黃金意氣驕四座悲風秋擊筑半
城殘月夜吹簫古來俠烈香生骨莫遣塵沙汗
救貂

湘湖即事

花殘鳥倦綠陰濃水漫湘湖三月中南雁已歸
漁浦暗嘉魚不上馬門空波飄蓴菜千絲碧日
射櫻桃萬顆紅桑梓如今正紛翳式微歌罷憶

梁鴻

夢溶叔

山城五月寒猶劇夢裏追隨夜較長海內音書
空悵望天涯燈火獨悲涼風流久曠東山興豪
宕應憐南阮狂雙劍有時能會合肯終埋沒損
輝光

無題

花暗重門燕繞梁珠簾半捲鬱金堂香雲縹緲
來青瑣斜日玲瓏照寶粧蜀錦畫長鋪翡翠吳
綾春暖挂鴛鴦鴛鴦含情轉盼風流盡笑殺羅敷自
採桑

越中秋懷三首

山陰風物入秋清晚稻離離一望平井邑浮烟
連海氣江湖積溜動潮聲越王城下寒雲散狂
客湖邊秋草生千載豪華同逝水丹楓幾處暮
蟬鳴

其二

山郭千家烟火深秋風江上驟驚心數聲欲斷

誰家遂萬杵連敲何處砧杜老祗緣多病苦潘
郎不覺二毛侵隔江蕭瑟兵戈裏日暮長歌白
石吟

其三

觸目能令遠客愁蕭條天氣況逢秋黃昏灑翰
題新句白日看山憶舊遊萬里風塵淹驥足十
年江漢敝貂裘平生意氣空零落歸向滄浪理
釣舟

詠史

東郭先生初起家十年無賴待公車忍將敝履
行霜雪羞向高門借齒牙一日殷名蜚殿陛即
時冠蓋動京華吹噓豈盡將軍力桃李門墻空
自嗟

汪守常夜至尋別去遊吳淞

江海頻年汗漫遊燈前何意忽相投旋迴雪夜
山陰棹虛度春風湖畔樓雲外松聲調鶴圃水
邊花氣釣鱸洲知君此去多新興莫惜瓊瑤慰
客愁

燈下憶家

雙溪寒色掩荆扉
殘雪孤燈抱影棲
春到欲歸沙上雁
夜闌連唱舍南雞
人淹海口三山北
家在吳頭一水西
幾度相思愁莫寄
情詩空向客中題

登嘉禾城樓望六里街

東南名郡石城標
路出青門六里遙
古寺樵蘇朱史墓
春湖烟水陸公橋
林端寶刹連霄漢
天際雲帆下海潮
處二桑麻間阡陌
往來歌曲雜

風謠

毘陵遇汪維一次韻兼致別意

天涯短棹倚芳洲
無數楊花水上浮
為客不孤三月景
逢君得解一春愁
風含綠樹吟黃鳥
日轉青蘋下白鷗
歸去錢塘餘興在
西湖重約採蓮遊

秋夜思家

西風蕭瑟桂花香
孤館淒清枕簟涼
萬戶寒砧霜浩二
一天秋月夜茫二
心飛蜃海鄉山遠
夢

繞駕湖客路長遙憶鋪糜人獨苦寒衣應就倩
誰將

移居雙溪舊館

東城高館俯青丘門外雙溪合故流閱歲烟波
何處客傷秋風雨舊時樓一春頗誤桃花水九
月重看蘋蓼洲海鳥山禽似相識野田飛噪亦
悠游

病起

一春辜負賞花天十日空堂抱枕眠荒徑雨滋
青草長閒庭風簾綠羅懸新方漸補清羸候宿
病頻催遲暮年起探溪山堪老處携家早結鹿
門緣

楊梅

五月郊原時果新楊梅初進席間珍丹丸沁雪
雙盤涌玉液流霞百顆勻橘子未諳江北客荔
枝空嗜嶺南人吳姬莫勸葡萄酒此味全欺閱
歲醇

從石橋過漁亭日莫失道

崇岡無徑草淒淒，怪鳥驚飛相對啼。
泉落丹崖秋澗咽，山含紅日暮天低。
看花未遇秦人問，採藥還同晉客迷。
一笑拂雲迴步去，卻隨明月過黟溪。

湖中二首

晴湖萬頃碧天開，遊遍南山又北來。
日暖花翁分菊圃，雲深葛令鍊丹臺。
長堤高柳陰移席，曲沼新荷香送杯。
取醉莫愁歸路晚，更乘明月棹歌回。

其二

晚湖風物更清妍，南北青峯相對懸。
落日長林圖裏寺，歸雲平浦鏡中船。
吳山蔥鬱留春靄，宋苑荒涼生暝烟。
回首逋仙行樂處，小亭雙鶴似翩翩。

九日登雨花臺

九日登臺訪昔遊，六宮遺跡賸風流。
人天小果真乘去，色相空談古寺留。
野霧迷花高座冷，江雲棲樹禁城秋。
尊前醉把茱萸酒，一望寒潮擁

石頭

過淮安

臨城相對撼驚波
水退平林帶遠莎
古岸幾家存白屋
長河千里注黃河
歲荒禾稻登場少
秋澇魚蝦入市多
誰解便宜專發粟
樓船使者但經過

旅中除夜

征輪迢遞發邯鄲
未入鄉關值歲闌
遠道長河行路險
朔風殘雪到家難
村中竹葉聊開席
旅次樹花且誦盤
今夕不勞相對守
亂山歸夢夜漫二

雪毬花

芳園春意半闌珊
瑞木花開素質寒
皎二冰蕤千瓣合
溶二霜萼幾枝攢
翻憐帶月梅相映
不逐東風絮作團
應是揚州舊仙種
尚遺彷彿世人看

春盡

春盡衡門挂薜蘿
舊交新歲幾相過
千秋白雪

知音少四處青山負約多被酒劇談令婦惱題
詩私賞對花歌故人珍重燕臺信欲採蘼蕪柰
莫何

登南山塔

南登寶塔俯平原城郭周遭瑞靄屯遠勢正分
鄣郡脈上游遙接浙江源雲中萬壑黃山與天
際諸峯白岳尊意極不知寰宇小偶因飛練望
吳門

中春

金堤殘雪尚依枝又值平分二月時閨裏佳人
憐晝永天南遊客訝春遲霜華斬暖花猶臥曙
色開晴鳥未知誰道東風能作主不禁離雁重
生思

暮春淮上

楚國春殘宿雨收綠楊飛絮攪離愁人間得失
拚長醉身外浮名惡強求滄海日邊涵蜃氣黃
河天上合淮流風沙變態難棲託歸去南山卧
一丘

十載

十載窮居積思深避人還自受人侵青春已負
蓬蒿累白髮猶懸江海心不分劔花狂後拭相
將詩草醉中吟閉門偃伏元龍氣一對長風更
不禁

題淮陰侯廟

國士無雙自古今尚遺廟貌祀淮陰三齊故假
封王印一飯曾酬漂母金楚水波光分海氣韓
山風色壯秋霖傷心不盡當年意蘆葦蕭蕭二夢
澤潯

耶溪懷古

苧羅山下美人家昔日遺蹤在若耶一自珠簾
籠皓月空餘碧榭映丹霞芙蓉尚想新妝面行
藻猶疑舊浣沙歸夢不知何處繞五湖烟水逐
浮艇

岳武穆祠

丹青廟貌儼尊崇千古將軍氣尚雄謾擬二宮
還絕漠可堪三字構孤忠南枝宰木靈飈動西

嶺殘霞落照空遺恨何人能謝事角巾日二醉

湖中

韓蘄王謝事居湖上角巾跨驢日醉而已

遊祇園寺

寺乃玄度舊居

許詢久逝杳難攀古寺今人尚往還定慧總勞
曇彥意來生不駐岳陽顏孤村落日西陵道廢
苑荒烟北幹山香刹相輪俱寂寞一春江水獨
潺二

送管鍊師遊關中

管故邊將也

四十投戈塞上還擬從紫府列仙班虎頭偃蹇
將軍貌鶴髮飄瀟稚子顏丹竈暫時留禹穴青
牛何日度函關懸知采秀遙天外相憶江南第
一山

雪後又雪獨酌

山城物候被春催六出瑤花幾度開斜日建瓴
初落盡東風拂檻又飛來應憐破臘豐年瑞且
進銷寒良夜杯醉裏笑歌還自適一枝香透隔
窓梅

邀陳朝珮同登白岳不值卻遇鳳凰山下

因拉以行

幾度期君登白岳相尋不遇興都闌到家笑見
門題午出郭欣逢鳳在山日下西村楓色暗風
高北嶺桂香寒黦溪滿月明秋壑今夜應同巖
際看

吳山眺望

玄關梵宇並巖從萬木參差翳碧空蜃海可遺
秦望蹟龍山不見宋時宮峯聯北剎湖光迥潮
捲西陵江勢雄漫憶傷心前代事錢唐烟月古
今同

寄汪守常

前年豪飲練溪橋別後相思酒未銷江上携家
君失意山中聽雨我無聊春風又度千門柳海
日重翻二月潮莫擬龐公栖宿穩白雲淒斷暮
天遙

七夕

天風縹緲弄雲韶彷彿和鑾度碧霄折木高橫
秋正淨纖阿徐下夜初遙牽牛想像年二會靈

鵲參差歲二橋可是蛛絲能借巧層樓瓜果故
相邀

徐園牡丹秋日復開

天上春歸秋復來名花兩度放瑤臺芳菲昔對
東風發穠艷今涵玉露開近水紅蕖應共妬
攔黃蝶漫相猜西園更借陽和色欲調清平媿
匪才

贈惟懷姪拜承天節推便道歸省

經綸三策獻明光一舉泥金薄海揚墨綬遙辭
雙鳳闕彩衣初上五雲堂郢中雪色新公署漢
上天潢舊帝鄉此去持平兼佐理明庭台輔屬
龔黃

寄漳浦金少府

秋入南中橘柚天美人初政試才賢漳江夜桂
閩關月梁岳晨開粵海烟家史遠趨啼鳥署島
夷遙避捕魚船明年上計朝元會佇看含香
近日邊

客淮陰

鼓瑟休誇動鬼神世間同好自相親
黃花對客情仍舊白眼看人交正新
南樹蕭疎鴉顧侶北雲淒斷雁隨賓
淮陰旅跡渾無定歲杪行驅何處塵

贈詹東圖

明年獨對大庭前走馬長安試玉鞭
紅粉笑看花下史錦袍醉挾酒中仙
香山瑞日舒清晝瓊島微風拂曙天
英主春秋今正富憑君文藻右時賢

新晴郊原即事

首夏初晴原野幽南山如洗曉嵐收
風生忽見盤雲鶴日出猶聞喚雨鳩
芳樹參差高影亂落花飄蕩斷香流水田青入新苗
長早晚農家至麥秋

遊禹穴

浩二滄江接混茫買舟東下謁前王
兩廂龍虎蟠陵穴百丈松杉儼廟廊
神怪至今依石鼎風雷不住護梅梁
由來才興山川助肯使龍門獨

擅長

夜坐

萬籟嘈々動旅情夜闌孤坐計歸程那堪候雁
風前斷况復寒砧月下情玉漏稀微秋露冷銀
河隱見楚天明來朝試問江南信叢桂如今勝
杜蘅

淮陰懷古

潦起懸河積幾深不堪懷古重傷神秋風直入
淮陰市薤露猶歌海島人楚苑那能回漢日甘
城無復駐秦春惟餘覆鉢丹砂跡欲向王喬乞
化身

旅懷

踈放無緣受世憐渡江寥落又經年懷人夜坐
淮陰月作客秋吟澤畔天雲外一行來北雁風
中五兩過南船憑渠欲寄相思語露草淒々家
若邊

重陽前一日汪維忠席上

長河滾々注淮流何處憑高賦遠遊客鬢星霜

唯對酒他鄉風雨易生愁丹楓忽憶南行好赤
地應憐北望修多謝故人能慰藉已拚沉醉射
陽秋

次韻答李功甫丈

陶家好酒一身輕招飲何曾問主名長缺歌魚
空壯氣孤琴彈鳳總希轂尊前大夸元無用河
上虛舟任自橫珍重高鴻傳尺素銜杯正對月
華明

汪濟甫過飲因懷守常

故人相見况逢秋此日同君異昔遊識字本非
楊子宅題詩真是仲宣樓雲迷東柵思行跡風
冷南溪憶好儔杯酒何緣頻欲起不因踈闊強
淹留

夜宿榔梅菴懷溪北友人

月明人靜羽仙房浙二天風度暗香夜半酒醒
寒不寢興來詩就語偏狂可憐梅榔花千樹忽
憶蕙葭水一方他日相期凌岳頂結茅長住紫
霄傍

五言排律

聽說邊事

見說邊城苦方知為將難一身兼九死五日并
三餐雪積黃沙凍霜飛紫塞寒骨開明出鏃髀
落暗消鞍萬里奔疏勒十年屯賀蘭功勛垂欲
建文法橫相干敢望封侯貴身名不易完

錢塘懷古次劉誠意韻

形勢兼中國繁華埒上都要荒元舊越疆理是
新吳舞鳳當天設飛龍列地圖青衣投絕域白
馬走羈孤戰伐資羣策馳驅合四隅側身雙闕
遠回首五陵蕪撥亂思明主持危識丈夫可憐
降虜表空負過河呼壯士悲刁斗忠魂怨獨鏤
本為恢復計翻作管絃娛固守愁多壘偷安愧
一區綺羅紛夜宴花石滿春湖燈品琉璃骨歌
行錦繡襦南風清殿閣北雪煖攪觥橘柚霜前
綴楊梅冰下濡鮮鯉時進御金幣歲輸胡一旦
天心厭頻年世事殊寇吟山上馬人惜屋間烏
曩隙開雙言敵干戈載道衢齒唇徒自廢豺虎不

堪俱浙水愆潮汐湖田空沃腴朔雲埋楚玉粵
淚泣鮫珠器亂身何寄傾危數莫逾祗緣安燕
逸那復顧艱虞玩武機權借崇文計畫迂傷心
重覽古江上釣秋鱸

表忠觀

中原方逐鹿南井忽生龍骨法占竒表神光著
異蹤奮呼當日起豪傑盡雲從單騎驅羣盜連
年滅二兇一王垂統緒三節擁提封公府湖寧
築胥江潮不洶姓名標竹帛勛烈勒彝鍾立國
爲謀壯開門服事恭錦衣懷故舊玉爵饋醇醲
鬪鴨吳常貢苞茅楚必供四隅無夜警千里事
春農歷世雄圖在累朝恩典重人心思德惠歲
祀走春冬碑碣名賢筆千秋對二峯

登飛來峯頂

小嶺分靈鷲支峯對廣寒仙宮飄桂路佛國雨
花壇洞壑千迴閱江湖四望寬古松蟠絕徑藂
竹抱修巒磴冷泉敲細巖虛日影端石穿呈異
狀山轉露竒觀懸壁晴疑雨陰崖濕不乾踐苔

臨險易攀木陟空難蓬島何虛誕桃源竟渺漫
人間有絕境更作一天看

夏日海上

我本山中客年二海上遊往來常泛棹暇日即
登樓溽雨千家暑涼颼六月秋海陰雲似潑湖
涌岸如流何術親鷗鷺無能走馬牛旅懷驚鬢
髮歸夢繞滄洲遠愧傭舂者悠游到白頭

過番陽湖次李空同韻

昌江飛一舸侵曉泛番湖旭日占真氣秋風憶
壯圖羣雄方逐鹿四海正瞻烏後舉英明主前
征僭竊徒君臣期共濟豪傑憤同呼履極開黃
道乘乾握赤符人心離僞漢天意注西吳劉令
謀何壯韓公死不辜白龍衝夕浪青鵝繞寒蕪
戰骨俱沉沒遊魂尚咽嗚江山遺跡在割據故
城孤噉二三秋雁蕭二兩岸菰乾坤氛祲日仁
義帝王須上策能先建中原豈並驅古來征戰
地今與逝波徂惟有康山廟千秋立懦夫

登粵秀山望廣州城

南望滄溟闊長江一道來山環任守墓城枕粵
王臺地險蠻烟直天渾瘴氣開九疑背聯絡五
嶺面崔嵬走集番船賈生涯海市財不寒看密
樹先暖見繁梅醉湧檳榔頰甘餘皺玉枚他鄉
風土異臨眺意悠哉

白嶽泰素宮

嶽秀鍾南徼星精應北辰巖端開福地天表肇
真人華蓋韜靈氣微垣淨劫塵龜蛇依玉座雷
電護金身玄扆依青嶂丹爐炷紫宸香烟飄上
界彩霧藹高旻漢帝祈禱日軒皇鑄鼎春神功
齊五時海內重明禋

立冬

纔過九月半又是立冬時閏後經寒早秋前得
氣遲雁來南渚冷鴉聚北風吹暮色楓林豔露
華菊徑滋高天宜遠眺斜日起遙思短髮逢衰
謝長途對別離跡違多想像歲晚益悽其憫俗
堪誰語諱窮但自知欲從屠狗者一理飯牛詞
商調空悲切千秋無子期

自嘆

諸生初托籍意氣凌青霄師友繆推許母兄因
見驕自從遭棄斥不復避喧囂千里伏騏驎一
枝慚鷓鴣夜牛旣喘月桀犬同吠堯張耳忍受
辱楊雄難解嘲山禽下午畷野豕遊春苗萬物
各有託吾生何無聊吟詩破寥寂假此日逍遙
送夏邑博歸蜀

聖世衣冠重儒門志行淳儲材元有待敷教可
無人夫子巴中秀明時席上珍由來詩禮舊不
獨藝文新南國羅時俊西揚起薦賓一官承雨
露萬里走風塵古縣今鄒魯名賢宋縉紳講筵
承統緒黌舍得逡巡絳帳徒矜俗青犢不厭貧
祿蕪仍借馬衣敝尚懸鶉夜水通環壁秋池長
藻蘋斗山同仰望華嶽並嶮峒直道功名薄殊
操官長嗔陶潛思菊柳張翰憶鱸尊且喜淳龐
貌渾忘寵辱身到來人似玉歸去髮如銀棲息
洪厓洞行吟巴字津揚玄聊養拙嚴卜且怡神
上校資耆德明君憶老臣申公須自愛早晚

駕蒲輪

沙南遺草七卷

休寧葉權中甫著

金鵠季黃選

汪大同公好閱

汪元英大呂校

五言絕句

西歸舟中七首

奔流下危石泛瀾如白雪鷓鴣貼水飛落影明
復滅

其二

青山四圍合日落寒潭綠松下有人家孤烟出
叢竹

其三

溪水涓涓淨今年天氣寒游魚依密藻不上小
磁灘

其四

三日打頭風柴賤河魚貴孤村新酒漿不減蘭
陵味

其五

去客挂片帆歸帆不能進何當似剡溪朝暮樵
風順

其六

溪水帶斜陽山鳥依叢樹村中有酒沽船傍人
烟住

其七

日暮山水佳微波蕩青嶂鷺鷥間鷓鴣點二漁
磯上

送別

別時殊造次坐久始相思
青草垂楊路何年是
返期

少女

十三十四時織二似新月
不解添人愁那知有
圓缺

咏荷四首

欲裁荷作衣荷小不覆肩
卻恨羅衣色不如荷
可憐

其二

一葉生一花一花還一蒂
昨日齒苔含今日笑
蓉翳

其三

蓮房在葉底中有白蓮子
賤妾處深閨心在千
萬里

其四

常憐藕有絲更惜芽如指
纖手擎玉盤不知何
者是

閨情十詠

喜

華軒自遠至結綬升北堂賜金盈百鎰長跪奉
姑嫜

憂

良人斷音信老姑殫門閭稚子日夜啼家無擔
石儲

怨

百兩送華奩玉容兼盛年未嘗虧婦道終不受
君憐

欲

入門舅姑愛婦寧父母箴嫁夫如冀缺生子似
曾參

怒

罄妝資遠遊裝盡倏來歸不惜共貧賤何以慰
親闈

樂

閨中畫眉罷堂上進食畢雙笑對春風百年如

一日

惡

桃葉唱團扇陽臺善歌舞尤物常在旁不忍開
阿堵

愛

大子通索丘中子戲俎豆小子方下懷學語更
清秀

閑

蝴蝶花間舞燕子梁上語長日偶停針別無他

意緒

忙

鳥啄筐中粟蠶需箔上桑兒啼求乳哺姑病待
甘漿

途中

落日起黃塵上有歸飛翼此時他鄉人望二情
何極

閨怨

男兒邊塞苦激發便封侯不似深閨裏千思坐

白頭

花蓋夫人詞

城上降旗豎宮中舞榭荒傷心前殿月不照舊
君王

同毛達夫携妓泛月湖二首

良夜挾飛瓊乘艤泛清渚明月展金輪疑對姮
娥語

其二

湖月照畫船玄冰湛清醕但知湖上涼不道人
間暑

自君之出矣

自君之出矣朱户生網羅思君如松柏四時不
改柯

五日席上

五日新蒲酒三閭舊俗辰滿筵長醉者何似獨
醒人

題美人圖

楚子陽臺夢陳王洛浦神相逢不解久爭似畫

圖人

大佛乃始皇繫纜石

繫纜曾何累逃禪且證心莫言無佛性元有點
頭因

曉晴即事

南陌花迎暖東林鳥噪晴早梅經雨落春水入
湖平

田家

連夜東皋雨田家四月閑秋成猶覬望何日解
愁顏

燈花

北隙風聲急銀釭手自遮非因衣帶結不忍落
燈花

四時草四首

階前春草生王孫客渭城深閨簾半捲風細露
華清

其二

階前夏草齊王孫客隴西南雲生遠岫凝睇萬

山迷

其三

階前秋草黃
王孫望故鄉
情多書不悉
看取舊衣裳

其四

階前冬草死
王孫思故里
歸夢托梅花
次第春風起

霧

長江起重霧
孤棹入混沌
微聞有人聲
茫二不

可問

南安道中雜詩五首

水明山路暗
漁火冒烟來
犬吠江村寂
梨花帶月開

其二

身爲嶺南客
舩插江西花
日暖遊蜂誤
春風信有涯

其三

高岸起飛鷺
遠山隨去舩
故人紅日下
鄉路白

雲邊

其四

籬下園畦茂花間舍宇稀
山童迎客笑水鳥背人飛

其五

南安庾嶺北花發早春時
一半餘寒在江村草未知

夜飲

逼歲情偏切還鄉夢屢迷
客中貪夜飲燈下促晨雞

霧淞

寒郊飛薄霧玉樹妥瓊枝
不是梨花雪東風莫浪吹

遣興

懶課兒童業時二醉酒家
春風三日煖開遍碧桃花

黑髮

黑髮莖二變青陽度二新春
花不耐久愁殺玉

樓人

夜飲

小席樓前夜高歌座上春銀瓶猶剩酒玉漏莫
催人

絕句四首

春花經雨後不作舊時香水性俱流下葵心自
向陽

其二

遇酒莫辭醉二時肝膽傾不謂君留意醒來懊
恨生

其三

女因容貌好不因容貌竒無錢之意氣不是好
男兒

其四

江南華子魚歸路有安車翻笑遼東客還鄉無
敝廬

寄衣

秋衣方寄便夜雨一朝寒要識關心處君將補

秘看

漁溪

春來日二雨水沒山前路鳥下杜若汀魚跳桃花渡

題陳道復花扇

妙手任丹青名花出點染香借露華穠色映朝陽豔

秋夜

夜靜蟲喧砌秋高月滿階微風梧葉墜何許不

關懷

鳴鶴

誰紀來巢異吾憐解語竒蒙恩自黃口又是著冠時

七言絕句

俠客行二首

金羈白馬擁雕鞍京尹門前弄赤丸慷慨報君寧九死候人顏色十分難

其二

少年氣壓五陵豪，手刃私讐避定陶。
沉醉有時仍故態，燈前調弄舊弓刀。

閨怨二首

萬里征夫久戍邊，香閨深鎖度年二。
風吹上苑花頻落，人在高樓月幾圓。

其二

將軍聞已勒燕然，何事征人尚戍邊。
蕙帳蘭幃身似寄，秋燈寒雨夜如年。

春思

日二湖邊小二樓，春風又入綠蘋洲。
相思欲訴憑誰寄，萬樹繁花對客愁。

聽查八十丈琵琶

新轂不及鬱輪袍，空撥皮絃挂錦絛。
獨向月明彈一曲，白頭雙淚落秋濤。

雨中漁家

頭白老翁傍水居，小舟蓑笠雨中漁。
鄰家晚火烟迷樹，門外吳船泊岸初。

夜泊

嚴陵灘上泊孤舟
明月當空江夜流
水鳥不依人處宿
亂鷺飛過白沙洲

嘉禾歌六首

漉湖流水出橫塘
湖上吳歌何郡郎
十里朱樓船到岸
檻前鷺起繡鴛鴦

其二

桂棹蘭橈湖上遊
碧天晴日映汀洲
桃花春水三千頃
畫出中流烟雨樓

其三

一斗新漿五十錢
瓦盆隨進四時鮮
重陽蠡蟹分湖水
小滿魚黃乍浦船

其四

隱_二青樓數十家
懷蘓亭下舊風花
郎錢一擲南湖上
任妾河邊自浣紗

其五

紅桃綠柳漾春汀
共喜和風十日晴
約伴祈蠶歷山寺
小船雙槳唱歌行

其六

畫船簫鼓小筵開
兒女分行互送杯
烟雨樓中春眺望
鴛鴦湖上暮歸來

塞下曲

胡騎縱橫入塞遊
鐵衣遮道為防秋
十年慣識燕山路
定請長纓繫虜酋

怨情

珊瑚枕冷晚粧遲
玳瑁筵開夜忽移
明月滿樓人又醉
雙二私語斷腸時

醉題

三徑荒蕪四壁空
褐衣甘與市人同
虎賁老卒皮毛似
痛飲無妨醉孔融

蠶蛾

獨對春蛾為愴神
翠眉雙掩不生鬢
明朝棄卻通衢裏
誰道嬋娟妬殺人

惶恐灘懷古

滄江積石阻寒流
一帶荒城別故丘
惆悵孤吟南去客
滿襟清淚對神州

南中

蠻山突兀瘴烟黃
郭內通潮斥鹵鄉
聞道錦江春色好
明年舟楫上瞿塘

彈子磯

北風跳波激石磯
鷓鴣避人委曲飛
青山盡頭有茅屋
古木踈林對落暉

舟中夜雨

蓬窓牢閉一燈然
岸上敲鐘夜未眠
二月花風吹野水
春寒先入雨中船

自南安至昌江再見桃花

暖入陽正物候新
嶺南歸客看花人
昌江二月桃初試
一歲如逢兩度春

春怨

誰道春風不慘神
梨花落淚柳生顰
流鶯一轉朱樓曉
腸斷雕欄獨倚人

初夏閨情四首

懊惱牆頭楊柳枝
長條折盡寄相思
如今花老紛如雪
又逐東風當戶吹

其二

途中馬上過秋胡道旁桑下立羅敷鶯兒莫啄
枝頭榭雪白羅衫不受汗

其三

儂自忙二郎自痴梁間燕子有雄雌饒他玉珮
從夫貴杜宇啼時怨別離

其四

種二名花手自栽春風次第賞花來荼蘼何事
相知晚儂理蠶桑他卻開

夢一甫兄

五更夢醒子規啼淚盡無言心意迷四十餘年
同樹鳥可憐生死不雙棲

早起

依二殘月樹梢斜一片輕雲變早霞繡戶朱簾
人未起啼鶯空喚隔牆花

贈程本道書記

錦衣書記繡鞍韉出入長安近十年若遇封章
能代草將軍須薦馬周賢

閨情雜詠六首

憑將數語報天涯
春後春前早到家
萬朵天桃紅滿樹
遊蜂偏戀半開花

其二

羅衾香暖夢堪憐
侍女窺窓曉日懸
趁出堂前雙燕子
生憎對語惱春眠

其三

碧桃花謝葉空存
獨子隨人出小門
聞道檀郎近他顧
春風斜入隔溪村

其四

孤枕清眠夢不成
一春憔悴為流鶯
只今哺子啼高樹
猶帶花間喚侶聲

其五

宿鳥啾二高樹陰
朱門雙掩夜初深
相邀女伴窺窓月
各有難言一片心

其六

欲度遙天之羽翰
碧梧霜冷雁聲寒
要知暗淚相思苦
試取瑤箏寶柱看

題楊妃春睡圖

金屋流光夜露香玉魚生潤口津涼君王自託
鴛鴦侶大襜誰知飛夢長

羅敷

車前芳草露痕新莫管羅敷原姓秦馬首空留
桑下陌蛾眉不矚路旁人

杯酒行

杯酒相逢意氣深男兒不必重千金何緣貴日
多忘舊翻憶窮時少託心

故人問予生計口號答之

問余生計近差強新穀那移補舊荒賴有牀頭
五千卷蓬門雖閉不淒涼

邊城曲

少小從軍累效勞雪中驅馬出臨洮將軍夜立
陰山壁頃刻冰城十丈高

春夢

狂夫幾載客幽燕昨夜朦朧到枕邊翻向覺時
思夢好雞鳴那得再成眠

與客夜談四首

快意黃金入手空癡心不信命能窮如今待激
西江水會見枯魚出肆中

其二

十五年前重報讐東鄰緩急夜相投寧知我立
門前兩雙戶牢扃不下樓

其三

上苑鶯花歲二新春風一任腐儒負黃梁若待
交遊送溝壑應多餓死人

其四

一色紅粧錦上花蛾眉爭向漢宮誇只言燕趙
多佳麗不道西施出若耶

偶成二首

高花不傍小園開門巷春寒長綠苔昨夜雨添
池上漲隔溪鷓鴣引雛來

其二

桑條路短竹歌斜草舍柴門委頓家喚取東鄰
聊共飲西風不久報籬花

示兒復陽

莫向東風怨不開
紫茄新熟好歸來
東隣有酒能沽得
父飲兒斟且盡杯

梨花白燕

奇毛不入梁間壘
玉質寧污陌上泥
惟有梨花同似雪
相憐應借一枝棲

邗江

邗江無復舊龍舟
楚水南來日夜流
二十四橋烟月在
不知何處是迷樓

曉雲

宿酒初醒夜漏稀
彩雲流豔曙光微
無端勾入襄王夢
上下陽臺伴雨飛

偶見

畫衣輕軟細風飄
行過朱欄白石橋
春色迷人濃似酒
桃花作意水邊嬌

題琵琶行圖

明月空舩起夜愁
琵琶猶訴舊風流
青衫掩泣秋江上
不似行題燕子樓

百舌

無端燕二與鶯二獨上高枝弄曉晴
嘹亂宮商
千萬語不知何句是真聲

吳娘曲二首

共理蠶筐餽葉齊
隔樓飛鳥半空啼
試窺窓隙
看天色殘月依二樹影西

其二

洗卻膏脂淨玉膚
蠶桑生怕膩香污
郎來遮莫
簾前坐一月樓頭伴小姑

蘓小二

結得同心雙鳳凰
相思日二挂柔腸也知楊柳
纖條好不及西陵松柏長

送丁水心西歸

離情未悉日將晡
秋滿蘆花雁侶呼
別酒沽來
須盡飲明朝風便射陽湖

春夜月下

梧桐枝老露淒淒
愛月終宵候月低
作底春來
情頓別日間花鳥使人迷

水榭

水榭風來花氣幽滿川天色素光流輕寒拂夜
初移榻明月窺人漸入樓

三茅觀

長松隱_二鬱寒林高殿陰_二噪夕禽欲向茅君
問丹訣萬峯無語對江心

山莊

雜木千章門徑深黃鸝紫燕起清音墻頭野蔓
爭穿瓦溪上寒松不入林

秋詞

籬菊秋深正吐芬自將攀折贈夫君寒風不惜
花千朵夜雨能添愁十分

燕

何幸栖君玳瑁梁薔薇花下趁餘香但教春色
年_二在不惜雙飛日_二忙

夜聞槽鼓

客夢初回夜聽清吳船搖櫓雨中行數聲啞啞
樓前過彷彿秋江鷺鷥鳴

西湖雜詩五首

湖烟湖水盡堪憐
歌舞船二載水仙十里繁
花
渾似錦滿湖晴日倒開天

其二

高僧尚憶參寥子
古跡猶遺六一泉
不見風流
蘓太守綠楊千樹鎖湖烟

其三

湖上春晴黃鳥嬌
故來人處弄簫韶
東風忽送
桃花雨飛過蘓堤第幾橋

其四

歌舞西湖何日休
明朝更作一翻遊
不看宋代
湖中水曾浣宮花入御溝

其五

纔過南山又北山
湖船男女坐相參
春風遍地
人皆醉二月花朝三月三

平戎詞

秋高獵火靜陰山
虜騎崩騰絕幕南
闕下報勛
私第臥雙鬟侍立睡初酣

春日飲溪上樓

楊柳橋西日欲曛東風拂水云
花飛錦障春三月人倚雕欄酒十分

客中寒食

楊柳烟清春欲深梨花日暖晝初沉
欲題寒食淒涼語忽動松楸雨露心

同汪惟一泛舟訪朱美人不值

高興汪倫最可憐桃花春水泛輕船
風流舊日金陵子家住西河若那邊

偶題

餘光四壁讀書燈窓外寒蟲亂擊聲
咄咄不須鑽故紙只從白日見分明

春園即事

花氣芬芳鳥語奇春光流麗日華遲
蒼苔紅藥連堦砌寫出風情謝眺詩

夢覺

蟲聲啾唧枕邊多夢合醒離愁柰何
起步簷前看明月雙星隱二隔天河

憶昔

菊滿庭前酒滿觴團團高月照華堂不知老大
秋生鬢猶向紅粧作故狂

聽砧

颯二秋風怨別離
擣殘清杵夜何其
不知明月窺人處
正在停砧佇想時

慰挺弟二首

一入牢籠不自由
丈夫隨世且沉浮
也知獄吏從來貴
曾取千金出絳侯

其二

十年意氣欲凌雲
彩筆曾題錦繡文
縱是太行能局步
鹽車騏驥本超羣

客中九日

他鄉久住日相親
把酒高歌對令辰
故里籬花今似底
天涯應憶未歸人

題並蒂蓮花二首

一色紅粧面二新
同心雙笑自相親
碧天玉露均恩澤
慚殺宮中好妬人

其二

池上微波漾落暉清香輕拂綠羅衣相看並蒂
雙二好未必君心誰是非

落石溪

一溪流水面寒山白鷺羣飛下急灘跨岸雙虹
長百尺行人併入畫圖看

遇賈姬

試說當初頰轉紅玉容零落故心同小樓歸燕
無消息懊惱風塵一斷蓬

西江途中懷守常濟甫

北風吹浪白皚二一片帆檣天際來我上君灘
君不見吳門月色爲誰開

望崖山

萬里洪流下漏天一航飛度竟何年也知海水
終難滿精衛堅心忍死填

飛來寺

龍象香牀金地開何年風雨竟飛來澄潭秀石
流清響彷彿雲韶天際回

晚發南安

正月初陽轉物華
南安桃李正開花
春風懊惱章江上
一色紅粧映晚霞

湖上散步

一湖春水路橫斜
步入平林問酒家
宿雨初晴風嫋嫋
滿堤楊柳亂飛花

月下閨情

深沉庭院鎖殘春
清坐良宵影伴身
惆悵相思何處切
月中時憶夢中人

其二

琥珀生寒睡未成
花陰不動夜常清
玉階歌立人無語
明月偏來照有情

至京師

重城漠漠殺風埃
名利無關訝此來
卻憶南天風日好
織塵不上釣魚臺

薊門懷古

悲歌易水吊荆卿
長嘯金臺憶郭生
同是報讐誰得意
秋風千古重含情

夢醒

老大無能置此身每憑春夢到家頻覺來殘月
窺窓隙愁殺長安旅臥人

長安街

長安西去近邊州十月冰稜滿玉溝一片風塵
貂敝盡莫貪沉醉酒家樓

射鳥少年

攘袂彎弓膽氣粗雙禽迸落血模糊銀瓶博得
東村酒半醉歸時月滿途

枯木寒鴉

憶昔濃陰蔽日長紛二春鳥任迴翔如今葉落
羣飛去祇有寒鴉噪夕陽

無題

重門深鎖燕分飛去二啣將別院泥畫棟無緣
依舊主春殘應夢故巢棲

淮陰飲友人宅

西風陣二拂簾鉤過雁聲二訴別愁珍重東君
催進酒不知南客正悲秋

絡緯

黃花綠萼翳秋棚
絡緯嘈二夜月明惱殺吳娘
弄機杼芳心無奈短長穀

竹菴

茅菴結構背山岡
綠竹千竿護短牆
靜倚窓前看白日
屢移踈影近藤床

初夏郊外

白雲如畫午風涼
大麥初收小麥黃
欲向前村訪幽僻
綠楊谿曲問漁郎

相思曲

一曲相思萬緒攢
莫蟬悲咽碧梧殘
誰云千里同明月
門掩清光不忍看

漂母祠

楚水滔二下遠天
夕陽衰柳亂鳴蟬
風塵滿目誰知己
已欲憶王孫受母憐

雨中

風吹荷葉綠離披
雨裏蓮花香滿池
細草青二蛙亂語
小亭山客獨吟時

春郊散步

畦菜花開野水平春雲初澹午前晴青郊獨步
東風峭半澁鶯聲似有情

席上

飛花一片舞晴空且醉今朝席上紅休論十年
愁恨事古來詞客命當窮

風塵

滿目風塵敝黑裘一年強半客中遊明珠留取
酬知己容易相逢莫暗投

詹鵬翼約遊長安

落魄南冠似楚囚相逢不忍按箜篌願將淮海
風塵色移醉長安賣酒樓

淮陰喜遇汪惟忠二首

天涯相見眼俱青三十餘年舊友生莫向長風
嗟短翮白雲應是遠遊程

其二

丹竈泥成君趣高黃金擲盡我粗豪今朝更作
他鄉會抵掌尊前笑二毛

望鉢池山

王喬昔駐鍊金丹赤石嵯峩鳳不還秋水沒堤
船不渡令人長望鉢池山

月下

離情已悉數行書獨坐清吟悵索居萬里西風
催新雁一天明月夜何如

贈別

一片飛帆到石頭十年幾度秣陵遊等閑莫玩
長干月能爲離人作莫秋

飲溪上酒家

青帘茅舍酒堪沽四壁溪山似畫圖隔水桃花
誰是主醉來拈點問當壚

九日同汪維忠飲南山下

少年意氣老難裁九日南山縱酒來白髮滿頭
仍故態相看籬菊冒霜開

見湖詩

靈鷲山前綠草齊鳳凰湖上白雲飛幽人卜築
依泉石時倚衡門望落暉

醉

黃花綠麥照芳春老大猖狂作酒人分付少年
休浪笑人生難得白頭新

春雨閨情

欄外花枝二月嬌窓前風雨鎮連朝可堪洗脫
三分色卻似朱顏被淚消

吳娘曲二首

書出條桑夜餒忙倦來假寐倚筐牀小姑惡戲
寒衣起短夢驚回日正長

其二

小繭光鮮一色新結時箇二是精神菱湖水色
縹成雪又屬誰家絡緯人

平胡曲

聞說胡魁悉就擒將軍歸馬絡黃金意中彷彿
南來狀一慰深閨久望心

神仙曲

一曲鸞簫出紫宮夜深圓殿起香風何人下界
留心聽環珮鏗鏘月正中

夢醒

大夢初醒塵世分乘風從此上青雲獨傳九奏
鈞天樂說與人間了不聞

長信怨

供奉依然寵愛同敢將團扇怨秋風也知禍水
能澆火多少娥眉負漢宮

少年行

俠士相逢意氣投柳車猶恃過通侯何人借與
來丹劔一藉神功閻取讐

腰痛戲作

熱濕生肌中濁醪角巾高挂已連朝客來拱手
還相笑不是陶潛懶折腰

期遊黃山二首

相逢幾度說黃山何日人間始是閑莫把明朝
成錯悞春風不待鏡中顏

其二

難得春風醉玉壺傾囊悉付酒家胡相將舊日
西湖侶點檢金箱五岳圖

梅花紙帳

刻藤數幅出山家誰寫寒梅代碧紗
夜半夢回聞玉笛月明不見亂飛花

續古樂府四首五言古詩二首雜著十首

行路難

北風吹枝昂復低隴有黍稷刈藿藜
一言適意謬推許兩情不合鸞化鴟
九月寒霜披嬾草江籬澗芷同枯槁
十年爲儒墻上花萬緒愁人眼前老
世有良寶良不虛韜光掩璞莫辨之
甌上探塵誤顏氏館中失屨疑子輿
青衫飄飄雙袖舉筵前劒戟交賓主
相逢欲飲誰坦懷明日更命高陽侶

梅花落

昨夜東風發梅花幾樹存客懷君自遣
閨怨妾何言長恨無霜實多情有夙根
春心何以託時倚望歸門

菩薩蠻

長干九日秋如錦雨花臺上風流飲
慷慨對高秋傷心年少遊故人悵何所
往事空能語他日

憶今年即如今憶前

行路難戲效李賀體

龍池軟纜五色絲樓船載伎花遲二幾許繁華
重春日萬千驕富憶當時當時好事安能得王
孫荷畚城東陌商丘子開無見識鮑焦餓死埋
枯骨烹龜煮玉備朝餐那識長安行路難

有感

人生若飄萍窮達命所成腐鼠嚇鷓鴣神龜拽
尾行所以北宮子担心東郭生茂菽有餘味筆
路若軒乘西門亦奚言世人徒自矜

詠懷

白日照廣庭行二暫閑適西風生清涼遙天亘
空碧飛鴻遠漸近啄雀去復卻上士驚饋漿下
客來爭席久要庸欲忘故情不能易卻望大江
南歸心似潮汐

銅雀硯贊

高臺旣傾西陵為陂松檟其摧總帳安施維此
瓦礫越在土泥博物君子過而識之如爨下材

如椽中竒載琢載磨旣潤且滋登君之堂翰墨
是資吁嗟渾堅其壽永且

鍾銘

採彼首山靈冶躍燁范今容成律中夷則丹房
叩之發越玄默鏘鳴悠揚鬼魅潛匿

假山銘

欽崎窈窕巧會天成赤城石梁宛在戶庭

古石硯銘

何山之石不生自洪荒人將保汝溫潤以臧不

然吾用汝支牀

鉄硯銘

日夜磨汝二必磷汝磷吾筆亦入神

筆架山銘

山立几二中書君所倚

墨銘

汨二者日月其磨我者亦何捷我亦磨汝歲十
百

棗木界方銘

心若爾赤行若爾直較若畫一

茶壺銘

鴟夷滑稽注不已不及此中風味美

鎖鑰銘

扃鑰以時薄藏我私念茲在茲一以貫之